

Mazarin  
2901

La promenade



UNIVERSITY OF N.C. AT CHAPEL HILL



00023007158

RARE BOOK  
COLLECTION



THE LIBRARY OF THE  
UNIVERSITY OF  
NORTH CAROLINA  
AT  
CHAPEL HILL  
Mazarin  
2901



2907  
LA PROMENADE  
O V  
LES ENTRETIENS  
D'VN GENTIL-HOMME  
DE NORMANDIE  
AVEC VN BOVRGEOIS  
DE PARIS,  
SVR LE MAVVAIS MESNAGE  
*des Finances de France.*



A PARIS,

---

M. DC. XLIX.



LA PROMENADE

LES ENTRAÎNÉS

D'UN GENTILHOMME

AVEC UN BOY

DE PARIS

PAR M. DE LAUNAY


A PARIS

M. DE LAUNAY

1



*LA PROMENADE, OV LES ENTRE-  
tiens d'un Gentil-homme de Normandie avec un  
Bourgeois de Paris, sur le mauvais mesnage  
des Finances de France.*

Le Parisien.  ONSIEUR, ie suis vostre tres-humble serui-  
teur.

Le Gentil-homme. Ha! Monsieur, ie suis le vostre de tout mon  
cœur.

Le P. Hé! quoy Monsieur, vous voila donc des  
nostres, nos afflictions ne vous espouuantent-elles point; Quoy! venir  
ainsi dans vne ville bloquée avec tant de chaleur & d'injustice.

Le G. Il n'y a pas long-temps que i'y suis, ce n'est que d'hier au soir seule-  
ment, encore a-ce esté pour apporter des nouvelles de Monsieur le Duc  
de Longueville, que vous aurez dans peu avec des forces tres-considerables,  
& avec toutes les affections de nostre Prouince.

Le P. Je suis ray de ces bonnes nouvelles; mais quel dessein avez-vous  
dans ce Faux-bourg.

Le G. Je m'y promenois en attendant l'arriuée du conuoy de Brie, que ie  
voulois voir passer.

Le P. I'y suis aussi pour le mesme dessein, si vous le trouuez bon nous  
nous promenerons de compagnie iusque dehors, & nous verrons avec  
moins d'incommodité ce qui s'y passe.

Le G. Je le veux bien; mais Monsieur dans vostre promenade, vous qui  
estes de cette ville, ie voudrois bien vous prier de me dire quelque chose  
sur le suiet de tous ces troubles; car dans nostre Prouince nous ne sçavons  
rien qu'en gros: & ie serois bien aise d'en apprendre des nouvelles certai-  
nes auant que de m'en retourner, spécialement s'il est vray qu'il y ait eu  
tant de desordre au maniement des finances du Roy, comme on le dit en  
nostre Pais; & s'il est vray aussi, que le Cardinal les ait si mal gouuernées  
& si hautement détournées & dissipées.

Le P. Monsieur pour vous satisfaire sur cette curiosité il faudroit vn peu de  
loisir, toutesfois nostre dessein de promenade est assez long pour en pou-  
voir dire quelque chose; c'est pourquoy si vous y voulez donner vostre at-  
tention avec patience, ie vous en entretiendray aussi long-temps que ie le  
pourray.

Le G. Helas Monsieur, non seulement avec patience, mais ie me rendray  
toute oreille si ie puis, afin de vous bien entendre, tant i'ay de desir d'ap-  
prendre quelque chose du détail de cette affaire.

Le P. Et pour vous satisfaire donc Monsieur ie vous diray, & vous le sça-  
uez, qu'il y a enuiron cinq ans, ou peu plus, que par le deceds du deffunct

A ij



Cardinal, celuy-cy fut admis au premier Ministère de l'Estat, vous sçavez aussi quel homme c'est, comme il vient de bas lieu, & de pauvres parens, & qu'il n'y a que ces sortes de gens là qui sont insatiables, quand ils se rencontrent en estat de pouvoir donner quelque chose à leur avidité, aussi ce Cardinal n'a-il rien oublié pour tâcher à rassasier son appetit déreglé, les impôts, les subsides, les taxes, les retranchemens de gages, & des rentes; enfin tout ce que l'Enfer pouvoit inventer ce Cardinal & ses supposts l'ont mis en vſage, & ont tellement tourmenté les riches & les pauvres, qu'enfin il les a quali tous rendus égaux; & s'il y en a encore quelques vns qui ne soient pas ruinez, du moins ils ont esté fort incommodéz.

Le G. Vous me dites là, Monsieur, d'estranges choses, mais neantmoins cela ne me rend pas plus sçavant que i'estois, tout le monde dit la mesme chose, c'est le bruit qui court, mais qui ne me satisfait pas; ie voudrois quelque chose de plus pour contenter ma curiosité.

Le P. Je le puis faire, Monsieur, & voyez comment vous sçavez que le Cardinal, comme premier Ministre, avoit vsurpé l'autorité de régler souverainement les Finances du Roy, tant en recettes que despens; & ainsi pour vous satisfaire il vous faut faire voir les abus qu'il a commis & souffert estre commis en l'un & en l'autre, ce qui me sera fort facile, vous sçavez donc, Monsieur, que tout le reuenu du Roy consiste en deniers ou leuees ordinaires & extraordinaires.

Sous l'ordinaire i'y comprends quatre sortes de deniers, qui sont le Domaine, les Aydes, la Taille & le Taillon, & les Fermes.

Et sous les extraordinaires toutes les taxes sur les Offices, creations nouvelles, engagemens de Domaines, ventes de rentes, taxes d'ayſez, retranchement de gages & rentes, prouision ou despens pour la faulſſe monnoye, & enfin toutes sortes de leuées violentes, & dont les Cours Souueraines n'ont fait aucune verification de tiltres, apres quoy ie vay commencer à vous faire voir le desordre qu'il y a eu dans la Recepte; & puis apres si nous auons assez de loisir ie vous feray voir celuy de la despée.

En la Recepte ie commence par le Domaine, il est vray qu'il y en a vne bonne partie d'engagée il y a long-temps, mais cet engagement estant fait à faculté de rachapt perpetuel, les Partisans du Cadinal ont incessamment par les menaces de ce rachapt, si fort tourmenté les engagistes, que presque tous les ans ils leurs faisoient payer des suppleemens dont les taxes montoient plus que le reuenu, tellement que ces engagistes ne retenans plus rien, n'auoient plus qu'une iouissance imaginaire.

C'en'est pas tout, car s'il restoit encore quelque chose au Domaine qui ne fust point engagé, ils le prenoient pour eux sous ce tiltre d'engagement, dont ils faisoient faire vne taxe, de laquelle ils prenoient vne Quittance de Finance, & en payement donnoient vne de l'Espargne qu'ils auoient pour vne Ordonnance de Comptant; à bon entendeur salut, c'est à dire vous m'entendez bien; mais il y a plus, car ie ſçay vn Domaine qui portoit à la recepte generale 61. à 62. mille liures par an pour le Roy, qu'on a donné depuis peu pour trente ou quarante mille liures: Bref, pour le peu de chose,



5

chose que le propriétaire n'en a osé faire registrer le contract, voila pas vn beau mesnage dans les affaires du Roy.

De plus, voyez encore vne autre violence, il y a eu vn party ou traité pour mettre sur les Tailles toutes les charges assignées sur les domaines, & d'autant que les engagistes doiuent au charges, on les a fait financer pour en estre deschargez, on a tiré de l'argent d'eux & vollé les pauvres assignez, car au lieu de ce qu'ils retenoient annuellement sur le domaine, on ne leur a plus rien payé, ny sur les tailles ny ailleurs, à cause qu'on n'a plus laissé aucun fonds pour ce faire,

Voila assez du domaine, ie veux estre succint, afin de mesurer mon discours à nostre promenade, c'est pourquoy passons aux aydes, elles sont aussi engagees, & le Roy ou les engagistes doiuent des rentes, qu'on a ostées ou du moins retranchées aux particuliers rentiers pour les appliquer au Cardinal & à ses supposts.

Suiuons & prenons les Tailles & le Taillon, c'est en cét endroit où le cœur me fend de pitié, considerez ie vous prie l'excez où elles sont maintenant, vne Eslection qui payoit en 1628. 40. mil liu. passoit es années 1645. & 1646. deux cent mill liures; voyez qu'elle augmentation sur le peuple, & pourtant en 1626. le Roy en receuoit presque autant comme à present.

Le G. Comment cela se peut-il entendre ?

Le P. Ie vais vous le dire. De cette Eslection que ie vous donne pour exemple, & qui portant en 1626. 40. mil liu. le Roy en auoit de reste les charges desdites, montant de 61. mil liures à 34. mil liures en quatre quartiers bien payez, sans non-valeurs, & sans remise de prest ny d'interest. Mais à present de deux cens mil liures, le Roy n'en touche pas 60. que ce soit le plus, & voyez comment par le moyen de la multitude d'es taxes qu'on a mises sur les Officiers leurs gages & droicts montent près de 50. mil liures, lesquels encorés que les Officiers ne les touchent pas ne laissent pas d'estre pris par des Partisans traittans ou porteurs de quittances. Il y a plus, car il y a encorés pour le moins autres 50. mil liures de non-valeurs à cause de la pauureté des Parroisses, reste donc cent mil liures, qui est la premiere demie, dont on fait vn traité ou forfait avec vn Presteur d'argent, auquel de ces cent mil liures on donne cinq sols pour liure de remise en donnant le quart comptant, & 50. mil liures en promesses, payables à plusieurs termes; de ces 50. mil liures en promesses on en traite encoré avec vn autre à vn tiers de remise, tellement que deduction faite de ces remises sur le principal, il ne reste plus au Roy de ces deux cens mil liures que 57. mil liures ou enuiron, sçauoir du premier traité comptant 25. mil liures, & du second 32. mil liu. considerez Monsieur, quel mauuais mesnage dans les affaires du Roy. Ce n'est pas le tout, faut aller plus auant, & considerons que ce mauuais mesnage-cy n'est qu'à l'esgard du Roy, mais venons à celuy du peuple, & considerons vn peu la liberté que le Cardinal a donnée à ces partisans de tourmenter & vexer les taillables: Ces traittans prenoient toute la France en party, & aussi tost ils estoient les seuls Maistres de la Taille, & par consequent petits Rois dans l'Estat, qui pensoient auoir droit d'enuiesager tous.



les biens des Subiets du Roy, leurs personnes mesmes, comme leur estant hypothéquez, ils trachioient des puissans, ils auoient des Intendans de Iustice à eux & à leur mode. Je puis bien dire à eux, puis qu'ils estoient à leurs gages & pensions, enfin ils ne confideroient plus les choses que selon leurs interets ou caprices, puis qu'ils se voyoient en estat de pouuoir impunément se mocquer de la Iustice.

Mais comme ce leur estoit vn trauail trop grand de leuer toutes ces choses par leurs mains, ils faisoient des Sous-Rois, en faisant des soustraits, & leurs donnoient à chacun vne ou deux qualitez, selon le pouuoir de ceux avec lesquels ils agissoient, & ces gens-là seuls traittoient encores par Elections, & en faisant tout cela, ils deposedoient les Receueurs generaux & particuliers de l'exercice de leurs charges, & donnoient pouuoir à ces sous-traittans d'y commettre qui bon leur sembloit; tellement qu'ils commettoient pour les exercer vn seul homme ou plusieurs, qui faisoient les receptes generalles & particulieres, & ausquels ils laissoient la liberté de faire telles exactions & concussions qu'ils vouloient, pourueu qu'ils fussent satisfaits de leur aduance ou forfait, & ces hommes ainsi proposez receuoient ce qu'ils pouuoient & de qui ils pouuoient sans aucun ordre ny regle de Iustice, & leur auance remboursée, s'estoit lors que les violences recommençoient de mieux, car du costé du Roy, c'est à dire les Partisans, puis qu'ils en auoient les droicts, ils n'auoient plus rien à craindre, n'y de cōpte à rendre, & du costé du peuple ils auoient encores à pretendre, & c'estoit là qu'ils ioioient hautement leur ieu, ou pour mieux dire leur violence, car ils ne laissoient pas de faire de rigoureuses poursuites, sous le pretexte du surplus, mais ce n'estoit qu'à leurs fins & non à celles du Roy, c'est à dire, ils alloient dans vne parroisse ou village avec des coupe-jarets, se disans Archers, emmenoit les meubles, vaches & cheuaux, bref, tout ce qu'ils trouuoient appartenant à ces pauures gens, leur faisant en cette sorte plus de mal & moins esuitable que ne leur en font à present les soldats Allemans qui sont autour de cette Ville, car à ces Allemans il est permis de repousser la force par la force, mais à ces premiers cela estoit deffendu à peine de la vie, tellement qu'ils auoient beau ieu, aussi ne s'y esparignoient-ils pas, ils emportoient tout, & reduisoient les pauures paisans à coucher sur la paille, & en beaucoup de lieux à viure de racines, pour n'auoir plus de cheuaux ny d'vstancilles avec quoy ils peussent gagner leur vie & celle de leurs petits enfans, dont on a veu quantité mourir de faim & de necessité, & avec tout cela, ces pauures gens n'estoient pourtant pas quittes, car ils vendoient ces choses à gens de leur intelligence pour la moitié de ce qu'elles valloient, & les deniers en prouenant n'estoient pas suffisans pour payer leurs frais, tellement qu'ils ruinoient les corps & les biens des subiets du Roy, dont sa Maiesté ne receuoit aucune chose, sinon vne insoluabilité pour l'année suivante, & c'est de là que sont venuës tant de non-valeurs.

Enfin, quand ces corsaires ou pirates de terre auoient aussi tout enleué, ou pour mieux dire, tout volé, ils s'en alloient sans en rendre aucun compte à personne; & comme s'estoient des gens incognus & sans aduen, parce



que les Partisans les desaduioient quand ils estoient rembourcez de leurs prests, disant qu'ils ne les cognoissoient pas, & que ce n'estoit pas eux qu'ils auoient commis avec Monsieur l'Intendant, contre lequel on n'osoit cy-deuant se pourvoir; Ce qu'ils pouuoient faire, puisque la corruption estoit si grande, qu'on les laissoit exercer sans donner caution, estant vne loy absolue; quand Monsieur l'Intendant auoit dit qu'il le vouloit, c'estoit allez, les pauvres Officiers des Prouinces n'osoient plus rien dire ny obiecter contre cette volonté rendue souveraine: Aussi Monsieur vous voyez iusques à quel point alloit ce desordre, & s'il pouuoit encore long-temps durer. Or comme ces mal-heureux Commis traualloient pour leur interest particulier, & non pour celuy du Roy; ceux qui de bon cœur ne leur vouloient pas, & aux Intendans, donner en presence ce qu'ils leurs demandoient, on les imposoit à trois fois plus haut la taille que ne montoit le reuenu de leur bien; Et puis ce n'estoit que contraintes, emprisonnemens, mesmes pour les soliditez, si leurs cottes ne suffisoient: Bref, les prisons estoient si pleines de ses pauvres gens-là, que c'estoit vn vray spectacle d'horreur, ensuite dequoy la necessité les rendoit incontinent malades; & neantmoins ces barbares aymoient mieux, tant la cruauté estoit grande parmy eux, les laisser mourir en prison, que de les faire sortir, ou leur donner quelque soulagement: Et toute leur raison n'estoit autre, à ce qu'ils disoient, sinon qu'il falloit que cette cruauté seruiſt d'exemple pour faire payer les autres. Quelle tyrannie; enfin, i'en aurois iamais fait si ie voulois continuer le recit des tourmens de ces miserables; ce que ie vous feroit tres-volontiers, n'estoit que nostre promenades acheue.

Voila donc Monsieur, & succinctement, ce que i'auois à vous dire pour le fait des Tailles, vous en voyez le desordre; les grandes impositions sur les peuples, le peu qu'il en reuient au Roy; & comme les Partisans & Traictans en auoient la meilleure part, aussi ne faut-il pass'estonner s'ils deuenoient riches en si peu de temps; mais aussi vous voyez comme ses richesses ne prouiennent que du plus pur sang du peuple, que ses sang-suës affamées tiroient incessamment des bras de ces pauvres miserables. Et comme pour ce faire ils leurs faisoient souffrir de grands tourmens, & supporter de grandes afflictions.

Le G. Je ne m'estonne pas Monsieur si Messieurs du Parlement sont si zelez pour le soulagement du peuple, & s'ils ont pris vn si grand soin à chasser ces mangeurs de Chrestiens, & leurs Intendans; ces nouueaux monstres, ou plustost les nouuelles bestes deuorantes, dont on auoit point encore oüy parler dans nos Histoires, estoient venus en France par ie ne sçay quel chemin pour tourmenter le monde; Mais Messieurs du Parlement leur ont fait si bonne guerre, à ce que ie puis apprendre, que l'on n'en verra non plus à l'aduenir que de loups en Angleterre.

Le P. Il est vray que quand Messieurs du Parlement n'auroient fait que ce bien là, la France leur a tres-grande obligation; mais il faut tant esperer de la misericorde de Dieu, qu'elle permettra qu'ils viendront encore à bout du reste de leur dessein, qui n'est autre, que de si bien reſtablir l'Authorité du Roy,



celle deses Officiers, que le soulagement du peuple ; que le Roy mesme vn iour benira leur entreprise, & tous les peuples en remercieront la Majesté Diuine, & aduouëront tenir leur soulagement des mains de nostre Auguste Parlement.

C'est à quoy il faut que tous les bons François s'appliquent, que de bien prier Dieu pour eux, & qu'il leur donne assez de courage & de force, pour bien racheuer ce qu'ils ont si heureusement commencé: Et ce qui nous doit faire espere tout bien de cette entreprise, c'est que vous voyez tant de bons Princes & Seigneurs qui se sont ioints avec eux, meus seulement d'une véritable charité, & détachez de tous autres interets, que celui de repousser l'iniuste tyrannie d'un mauuais Ministre. Vous voyez vostre Parlement, celui de Prouence qui s'y sont ioints ; & on n'attend de iour en iour que la mesme nouuelle des autres : Enfin, Dieu tout bon & tout misericordieux, aura assurément pitié de son pauvre peuple.

Le G. Aussi-tost que ie seray arriué à Rouen, ie ne manqueray de m'aquitter de ce deuoir enuers Dieu, & d'y exorter tous mes amis: mais nostre promenade s'auance, & vous avez encore bien des choses à me dire, du moins seulement ce que vous m'avez promis.

Le P. Il est vray, mais nous voila à la porte de la ville autant vaut, il n'y a plus assez de temps pour recommencer une nouuelle matiere: si vous ne partez point si-tost nous continuërons demain à pareille heure le reste, sinon ce sera à vostre premier voyage.

Le G. Je dois auoir mon expedition ce soir, & si ie l'ay, ie partiray aussi-tost: mais j'espere de reuenir en bref.

Le P. J'en suis bien aise, ie me souuiens bien de ce que ie vous ay promis: à vostre premier voyage, si vous me faites l'honneur de venir prendre un petit dîner chez-moi, nous tascherons de racheuer le reste: Et pour ce faire nous continuërons nostre promenade & nostre entretien; & mesmes si ie vous dit quelques mots peut-estre obscurs, à cause qu'ils ne sont pas de vostre profession, me les faisans remarquer ie vous les expliquerai plus au long: enfin, ie vous donnerai de mon loisir autant que vous en desirerez, aussi bien dans le temps où nous sommes les affaires ne pressent pas trop, ioint que c'est heureusement passer son temps, que de l'employer avec si bonne compagnie comme est la vostre: Et si vous avez remarqué d'étranges choses en ce que ie vous ay desia dit, j'en ay encores bien d'autres à vous faire sçauoir sur le mauuais vsage & diuertissement des deniers du Roy: Cependant ie prie Dieu qu'il vous conserue en sa garde, & que j'aye l'honneur de vous reuoir bien-tost en bonne santé.

Le G. Je vous ay trop d'obligation, vos bons entretiens & vos bons souhaits me rendent impuissans à les pouuoir recognoistre, si dans nostre Promence ie puis quelque chose pour vostre seruice, ie le ferai de tout mon cœur.

Le P. Je vous en remercie, quand à present ce sera pour quand nous serons en une saison moins empeschée & plus tranquille.

Le Gentil homme. Adieu donc Monsieur.

Le Parisien. Adieu.







